

陳氏源流攷

吾宗爲虞舜之後禹封商均於虞裔孫遏父爲周陶正生滿武王配以元女太姬而封之陳是爲胡公子孫以國爲氏此吾宗得姓之始周敬王二十四年有諱衍者遷陽武戶牖漢丞相平產於是鄉實其嫡派佐高祖定天下後封戶牖侯改封曲逆侯詳史記陳丞相世家傳至東漢時而有太邱長實以德化民嘗偕諸子及孫等詣荀淑家討論是夜太史奏德星聚奎當有賢人聚會因顏其堂曰德星堂年八十四卒海內赴弔者三萬餘人諡文範先生子曰紀字元方曰諡字季方克世其德時號三

君每公府辟召一門羔雁成羣見者嘆美元方子長文季方子孝先各論其父功德不決質於祖太邱太邱曰元方難爲兄季方難爲弟後魏文帝御碑紀之紀子羣兒時太邱嘗語人曰此兒必興吾宗魏官尙書僕射有正直聲每上封事輒削其草時人及子弟莫知也論者或譏其緘默後詔錄名臣奏議朝士乃見所條上皆嘆息焉青龍年薨謚靜侯靜侯生穆侯泰泰生恂恂無嗣弟溫紹封譙子無考孫佐爲青州刺史佐生晉太尉準準生匡匡生達永嘉中自潁川遷吳興爲丞相擢太子洗馬出爲長城令悅其山水遂家焉嘗謂所親曰此地山川秀麗當有

王者興焉二百年後我子孫必鍾斯運達生康復爲丞相擢咸和中土斷故爲長城人康生肝胎太守英英生尙書郎公弼弼生步兵校尉鼎鼎生散騎侍郎高高生懷安令詠詠生安成太守猛猛生太常卿道巨道巨生陳太祖景皇帝文讚文讚生昭烈王道譚仕梁爲東宮直閣將軍武帝霸先其弟也侯景之亂道譚援臺中流矢卒紹嘉二年贈南兗州刺史義興郡公謚曰昭烈武帝受禪追贈太傅改封始興郡王子頊初封安成王爲司徒錄尙書事與武帝子昌同陷於周後得南還入承大統是爲宣帝宣帝生宜都王叔明禎明間避居江西後入隋爲鴻臚

少卿當開皇混一之後其時陳氏子弟皆配於隴右河西諸州
大業間胥召還京師隨才敘用由是並爲守宰遍於天下叔明
五世孫兼唐時官右補闕兼生秘書少監集賢院學士京京無
子以從子鹽官令褒爲嗣褒生高安丞灌灌子無考孫伯宣曾
註史記行於世游廬山因居德安以著作佐郎召不起子崇爲
江州長史僖宗時嘗詔旌其門南唐又立爲義門免徭役崇兄
諱端者宦遊於外咸通間授招討使以助剿黃巢功封威烈將
軍後爲武安節度使武安卽今之長沙因家焉後唐同光時卜
居金鏗大塘是爲江州遷湖南之初祖墓在今瀏陽筍箕坡長
沙陳氏自此始嗣孫文瑋謹述